



АКАФИСТ
СВЯТИТЕЛЮ
Игнатию Брянчанинову




Рака с мощами святителя Игнатия Брянчанникова
в Крестовоздвиженском храме Толгского монастыря



АКАФИСТ

СВЯТИТЕЛЮ

ИГНАТИЮ БРЯНЧАНИНОВУ



**По благословению
архиепископа
Ярославского и Ростовского
КИРИЛЛА**

АКАФИСТ

СВЯТИТЕЛЮ

ИГНАТИЮ БРЯНЧАНИНОВУ

Кондак 1

Избранный Небесным Царем и от Него прославленный, святителю отче Игнатие, ныне всечестную твою память празднующе молим тя усердно: путеводствуй нас на пути спасения, избави от врагов видимых и невидимых, от скорбей и болезней с любовью зовущих ти:

Радуйся, святителю Игнатие, покаяния и молитвы делателю и учителю презрядный!

Икос 1

Архангели и Ангели удивляхуся житию твоему, святителю отче Игнатие, како ты от лет малых к Богу велие рачение имел еси и по заповедем Его житие твое неуклонно проводил еси. Дивящеся таковому благоразумию твоему, со умилением взываем ти:

Радуйся, скорбящих безчадных родителей твоих рождением своим утешивый.

Радуйся, рода честного отрасль прекрасная.

Радуйся, Ангела хранителя твоего непрестанное веселие.

Радуйся, родителей и наставников твоих своею кротостию и покорностию удививый.

Радуйся, от лет младенческих ко иноческому послушанию себе приуготовивый.

Радуйся, душу свою младенческую к Богу устремивый.

Радуйся, в молитве и богомыслии отроческия своя досуги проводивый.

Радуйся, для меньших братьев и сестер твоих пример молитвы и послушания бывый.

Радуйся, святителю Игнатие, покаяния и молитвы делателю и учителю преизрядный!

Кондак 2

Видяще родители твои великая твоя дарования, направиша тя в царствующий град, да обучен будеши к восприятию воинского звания. Ты же, избранниче Божий, юн сый леты, стар же разумом, вся сия, яко тленна и скоропреходяща почиташе, к Единей же Красоте и Бладоути неизреченней – Господу Иисусу Христу умом и сердцем устремлялся еси, поя Ему: Аллилуна!

Икос 2

Разум Божественный от возлюбленнаго тобою Спаса Христа приял еси, Игнатие досточудне, егда, еще отрок сый, во всех видимых образех мира сего рүкү Небеснаго Творца и Промыслителя проразумевал еси. Темже прославляя тя, вопием ти сице:

Радуйся, в видимых явлениях природы Невидимаго Бога созерцавый.

Радуйся, тишину и уединение лесное возлюбивый.

Радуйся, от лет отроческих к Богу велие
рачение имевый.

Радуйся, вся красная и сладкая мира
сего презревый.

Радуйся, мзду небесную от Господа
восприявый.

Радуйся, молитву Иисусову уста
непрестанно творивый и во уме содержавый.

Радуйся, совершенную любовь ко Господу
показавый.

Радуйся, возлюбленного тобою Иисуса
выну в сердце твоём носивый.

Радуйся, святителю Игнатие, покаяния
и молитвы делателю и учителю презрядный!

Кондак 3

Силою Вышняго осенен был еси, отче
превлaженне, егда вся, яже в мире сем за
блага почитаются, отвергъ еси, и по
заповеди Христа Спасителя, взем крест,
невозвратно Ему последовал еси, неперес-
танно поя в сердце твоём: Аллилуиа!

Икос 3

Имея в души своей пламенное желание мир оставить и Христу последовати, не убоялся еси ни гнева царева, ни прещений отеческих и, еще в мире живый, иноческим житием себе украсил еси. Темже, почитая мужество твое и любовь к Владчайшему Господу Иисусу, блажим тя сице:

Радуйся, во младости твоей адамантову твердость духа проявивый.

Радуйся, еженедельнаго приобщения Святых Христовых Тайн яко величайшаго сокровища желавый.

Радуйся, на небесех ныне Христа приобщаяйся, якоже вождедел еси, еще сый на земли.

Радуйся, яко семя Божие, всеянное в добрую землю сердца твоего, обильными слезами орошал еси.

Радуйся, яко посреде мирских плевел, сторичный плод добродетелей Господу принесл еси.

Радуйся, чистоты душевныя и телесныя
усердный хранителю.

Радуйся, целомудрия дивное украшение.

Радуйся, яко благолепие лика твоего о
душевней красоте твоей свидетельст-
воваше.

Радуйся, святителю Игнатие, покаяния
и молитвы делателю и учителю преизрядный!

Кондак 4

Буря помышлений сумнительных не
поколеба Тя, Игнатие блаженне, егда
гнева царева не убоявся, чин воинский
оставил еси и подъяв на ся иго Христово
и мир с соблазнами его презрев, в пустыню
вселился еси и тамо желанный покой души
своей стяжав, немолчно пел еси Богу:
Аллилуиа!

Икос 4

Егда слышано бысть во отечестве
твоем, яко ты, юн сый леты, лепотою
и дарованьми украшен, славу мира сего и

сладости его возненавидев, в пустыню
удалился еси, вси сродницы твои вельми
удивляхуся, Ангели же на небеси возрадо-
ваша зело и прославнша Бога, восхитив-
шаго тя от суетнаго пути мирскаго и
поставившаго на тесный путь иноческий,
ведущий в Царство Небесное. Мы же,
похваляюще святую ревность твою о Господе,
зовем ти:

Радуйся, званію воина царя земаго
звание воина Царя Небеснаго предпочтый.

Радуйся, на искушения от мира, плоти
и днавола находящая крепко ополчивыйся.

Радуйся, оружіем Божиим, Крестом
Христовым, вся козни вражия поведивый.

Радуйся, бронеею праведности облеченный.

Радуйся, шлем спасения стяжавый.

Радуйся, меч духовный, еже есть глагол
Божий, паче всякаго человеческого оружія
возлюбивый.

Радуйся, щитом веры от стрел лукаваго
себе оградивый.

Радуйся, чина ангельскаго блаженство неизреченное в чертозе Небеснем получи-
вый.

Радуйся, святителю Игнатие, покаяния и молитвы делателю и учителю преизрядный!

Кондак 5

Боготечней звезде подобен был еси, Игнатие преподобне, егда предстал еси пред нгүменом обители дальния и скудная, прося прияти тя в число братии. Игүмен же, испытав тя, ничтоже вопреки глаголаше, благослови тя на начало иноческаго пути твоего. Ты же, улүчив чаяний твоих заветных сбытие, благодарно воспевал еси во умилении благодеещему тебе Богу: Аллилуиа!

Икос 5

Вся братия обители удивляшеся, зрящи великое тщание твое во исполнении послушаний, и миже испытоваше твое смирение дүховный отец твой. Мы же,

почитающе подвиги и труды твоя, во
младых летах волею Христа ради
подъятыя, ѹмиленно вопием ти:

Радуйся, крест свой на рамена подъявый
и Христу последовавый.

Радуйся, ѹзкий и прискорбный путь
жития монашескаго волею избравый.

Радуйся, вспять николиже обративыйся.

Радуйся, смиреннѣм своим дѹха гордыни
низложивый.

Радуйся, талант свой в земли не
сокрывый.

Радуйся, во славу Божию и на спасение
дѹш человеческих его ѹпотребивый.

Радуйся, богомѹдрыми писаньми твоими
многия дѹши, во гресех погрязшия, ожививый.

Радуйся, сладкий глас Небеснаго
Домовладыки: «Рабе благий и верный, вниди
в радость Господа Твоего», ѹслышавый.

Радуйся, святителю Игнатие, покаяния
и молитвы делателю и ѹчителю преизрядный!

Кондак 6

Смирением, постом, наипаче же непрестанною молитвою, на страсти плотския крепко ополчился еси, святителю, дондеже плоть твою дүхови поработил еси и сего ради ныне предстоиши с лики Ангел Престолу Пресвятыя Троицы, выну воспевая: Аллилуиа!

Икос 6

Возсия в тебе обильно благодать Божия, егда ты, чин ангельский восприяв, вскоре саном священства почтен был еси. Дүх же твой, приятый во объятия Отца, тебе отверстая, блаженство неизреченное вкуси. Егда же избра тя Господь во игүмена овители Пельшемския, ты о словесных овцах твоих, тебе Богом врученных, денно и ноцно пекся еси, да ни едина от них погибнет нерадения ради твоего. Таковому Божию о тебе промышлению радующеся, зове м ти:

Радуйся, в приятин ангельскаго чина
завершение чаяний твоих узревай.

Радуйся, небесному покровителю
своему, священномученику Игнатию
Богоносцу, подражавый.

Радуйся, якоже и он Господа Иисуса
Христа в сердце твоём вынү носивый.

Радуйся, сан священства, яко великий
дар Божий, приявый.

Радуйся, огню тезоименитый, огнем
веры и любве к Богу и ближним пламеневый.

Радуйся, с благоговением великим
и страхом Безкровную Жертву приносивый.

Радуйся, Пренепорочную Матерь
Христа Бога нашего, яко Чистейшую
Святыню и Сокровище Славы Божия
благоговейно почитавый.

Радуйся, храм благоукрашенный во имя
Милостивыя Вратарницы во обители
воздвигнувай.

Радуйся, святителю Игнатие, покаяния
и молитвы делателю и учителю преизрядный!

Кондак 7

Хотя Человеколюбец Господь, да не сокрытъ будет светильник добродетелей твоих, но да светит всем, да прославят Отца Небеснаго вси человецы, видящии тя, изведе тя из обители пустынная на многотрудная послушания. Сему Божию промыслению дивящеся, со умилением зовем: Аллилуиа!

Икос 7

Новей обители преподобнаго Сергия близ царствующаго града дарова тя Господь, яко предстоятеля и добраго пастыря, неусыпно о словеснем стаде своем пекущагося и о благолепии обители ревнующаго. Сего ради и славяще тя братия твоя, взывающи:

Радуйся, Небесному Покровителю обители твоея, преподобному Сергию, игумену Радонежскому, подражавый.

Радуйся, дивными храмы и строеньми сию украсивый.

Радуйся, яко отец чадолюбивый чад своих по пути спасения в Царствие Небесное ведый.

Радуйся, жаждавших вступите на путь иноческий с любовью во обитель приймавый.

Радуйся, провинившихся иноков увещеваньями своими к слезному раскаянию приводивый.

Радуйся, яко пастырь добрый житием своим и нравом всем братьям пример подвига иноческаго подававый.

Радуйся, за спасение их души свою положить готовый.

Радуйся, монашествующих славо и похвало.

Радуйся, святителю Игнатие, покаяния и молитвы делателю и учителю преизрядный!

Кондак 8

Странник и пришлец на земли был еси, святителю, якоже прочии человецы. Обаче Господь от лет младенческих избра тя, яко угодника Своего, житием бо и богодухновен-

ными писаньми твоими Господу усердно послужил еси. Мы же хвалу возсылающе ко Благодеющему тебе Богу, вопием Ему: Аллилуиа!

Икос 8

Весь добродетелей исполненный, воистину был еси во плоти Ангел, святителю Игнатие, всех притекавших к тебе с любовию принимая, скорби их утешая, на путь покаяния наставляя, непрестанней молитве и плачу сердечному научая. Сего ради богатии и беднии, знатнии и убози людие, духовная чада твоя, взываху ти:

Радуйся, новый Златоусте, огненными словесы твоими многая заблудшия путем покаяния к Богу приведи.

Радуйся, писаньми твоими души и сердца всех чтущих тя просветивый.

Радуйся, за враги своя молитися наставлявый.

Радуйся, и сам за враги твоя с теплою любовию моливыйся.

Радуйся, во враждующих на нас оружие
Божие ко исправлению нашему разумети
учивый.

Радуйся, Езекиины слезы и Манассинны
воздыхания духовным очесем кающихся
представлявый.

Радуйся, подвиги и труды подвижников
древних в богомудрых творениях твоих
изобразивый.

Радуйся, в житии твоём всецело им
подражавый.

Радуйся, святителю Игнатие, покаяния
и молитвы делателю и учителю преизрядный!

Кондак 9

Все воинство ангельское и святителей
лик удивишася, зря тебе, новаго угодника
Божия, великими труды и подвиги просияв-
шаго. Мы же, ублажая тя, прославльшему
тя Богу вопием: Аллилуна!

Икос 9

На новое многотрудное послушание в дальний край отечества нашего отшел еси, святителю Игнатие, егда жезл архиерейский от Предвечнаго Архиерея Господа нашего Исуса Христа вручи тебе Архипастырь царствующаго града в Казанстем соборе Царицы Небесныя.

Разумеюще в сем волю Божию, да и в чуждей стране проповестся товою Евангелие Царствия Божия, смиренно зовем ти:

Радуйся, в хиротонии обильно благодать Божественную восприявый.

Радуйся, Апостольскаго учения исполненный и вся верныя спасительными струями его напаяй.

Радуйся, верный делателю винограда Христова.

Радуйся, цевнице дүховная, Дүха Святаго исполненная.

Радуйся, архиереев богодүховенное үкрашение.

Радуйся, яко үстами твоими провеща-

ваше возлюбленный тобою Господь.

Радуйся, духовных братьий и чад твоих во обители преподобнаго Сергия, аще и телом оставивый, обаче в молитвах своих их николиже забывый.

Радуйся, всем верным и неверным, призывающим тя на помощь, милостивый заступниче.

Радуйся, святителю Игнатие, покаяния и молитвы делателю и учителю преизрядный!

Кондак 10

Немощию телесною и подвигами жития утружденный, во обитель святаго Николая на реце Волзе удалился еси, святителю Игнатие, хотя душу свою ко отшествию от мира сего уготовати, идеже в богомыслии и молитве единенней дни своя скончавая, пел еси немолчно Богови: Аллилуиа!

Икос 10

Скорый помощник и утешитель был еси, святителю Игнатие, не токмо к тебе

приходящим, но и далече сущим, писаньми твоими их утешая, дух их ободряя и вразумляя. Сего ради и возглашают ти вси чтущии богомудрая творения твоя:

Радуйся, пастырю наш добрый.

Радуйся, приходящих к тебе николиже отвращаяся.

Радуйся, просящих твоея помощи ближних и дальних любовью своею объемляй.

Радуйся, чтущих со тщанием писания твоя в теснейшее единение с душою твоею приемляй.

Радуйся, чад своих духовных христианскому терпению учивый.

Радуйся, в страданиях наших промышлене Божие о спасении нашем видети наставляяй.

Радуйся, всецело предатися промыслу Божию чада своя научивый.

Радуйся, совершення над нами воли Его, яко милости великой, просити у Господа заповедавый.

Радуйся, святителю Игнатие, покаяния
и молитвы делателю и учителю презрядный!

Кондак 11

Пение всеумиленное приносил еси
Пресвятей Троице во вся дни земнаго
жития твоего, Игнатие всехвальне. Ныне
же предстоя Престолу Царя Славы, молися
о нас, чтущих святую память твою, да
молитвою и покаянием очистившись, с
тобою купно во веки веков воспоем Богу:
Аллилуя!

Икос 11

Светильник великий Святых Православ-
ных Церкви в житии своем был еси,
святителю Игнатие, и сего ради дарова
тебе Вседержитель Господь кончину чудную
и прослави тя на небесах. Просим тя,
святителю милостивый, испроси и нам
грешным, твоя помощи и предстатель-
ства умоляющим, кончину жития нашего
мирную и безболезненную, добрый ответ на

Страшнем Судищи Христове и Царства
Небеснаго наследие, да зовем ти радостно:

Радуйся, праведною кончиною правед-
ность жития твоего запечатлевый.

Радуйся, близость отшествия твоего
предуведевый.

Радуйся, со светильником горящим
Небеснаго Жениха души своея сретивый.

Радуйся, в день кончины твоея с женами
мироносицами Воскресшаго Спасителя узревый.

Радуйся, чтущих тя и по смерти николиже
своего предстательства лишаяй.

Радуйся, всех усердно тебе молящихся
благодатию и попечением своим покрываяй.

Радуйся, твердо держатися единыя
истинныя святыя Православныя веры чада
своя учивый.

Радуйся, вся прельщения еретическая
принимати и увещаниям их лукавым внимати
строго запретивый.

Радуйся, святителю Игнатие, покаяния
и молитвы делателю и учителю преизрядный!

Кондак 12

Благодать дадеся ти от Бога, святителю Христов Игнатие, молитися за ны и путе- водствовать нас на пути спасения, да покаянием очищенни, в чертог Спасов преукрашенный внидем и тамо с тобою и со всеми угодившими Богу радостно воспоем Ему: Аллилуиа!

Икос 12

Поюще Бога, дивнаго во святых Своих, хвалим тя, Игнатие блаженне, яко друга Христова, блаженство райское неуклонным творением заповедей Господних стяжавшаго. Моли о нас грешных, да и мы общники с тобою вечери Господней будем, умиленно зовуще ти:

Радуйся, глубочайшим смирением твоим, нищетю духовною Царство Небесное обретый.

Радуйся, добродетель сию во основание всех подвигов иноческих полагати заповедавый.

Радуйся, во плаче о гресех своих Самим Господом утешенный.

Радуйся, за кротость души твоея наследие жизни вечныя получивый.

Радуйся, в земном житии правды Христовой, а не брашна тленнаго искавый, ныне же на небесех ею обильно насыщаешься.

Радуйся, за милосердие твое к ближним от Бога Щедродавца помилованный.

Радуйся, за ангелоподобную чистоту сердца твоего Бога узревший.

Радуйся, вся клеветы и поношения ненавидящим тя Господа ради прощавый и за сие, яко миротворец, великаго сокровища — усыновления Богу сподобивыйся.

Радуйся, святителю Игнатие, покаяния и молитвы делателю и учителю преизрядный!

Кондак 13

◊ предивный угодниче Христов, святителю отче Игнатие! Прими сие малое, обаче от любящих и чтущих тя сердец,

приносимое ти моление и избави нас твоим
всемощным предстательством от всякия
скорби, болезни и печали, согрей охладев-
шая души наша огнем веры и любви к Богу,
даруй нам прежде конца покаяние, буди
нам к Царствию Небесному путевождь,
да тамо с тобою и со всеми угодившими
Богу во веки веков поем Ему: Аллилуна,
аллилуна, аллилуна!

*Сей кондак чти трижды
и паки икос 1-й и кондак 1-й.*



МОЛИТВА СВЯТИТЕЛЮ ИГНАТИЮ

О великий и пречудный угодниче Христов, святителю отче Игнатие! Милостиво прими молитвы наша с любовью и благодарением тебе приносимыя! Услыши нас сирых и беспомощных, к тебе с верою и любовью припадающих и твоего теплаго представительства о нас пред Престолом Господа Славы просящих. Веemy, яко много может молитва праведника, Владыку умилоствяляющая. Ты от лет младенческих Господа пламенно возлюбил еси и Ему Единому служити восхотев, вся красная мира сего ни во чтоже вменил еси. Ты, отвергся себе и взем крест твой, Христу последовал еси. Ты путь узкий и прискорбный жития иноческаго волею себе избрал еси и на сем пути добродетели великия стяжал еси. Ты писаньми твоими сердца человеков глѹбочайшаго благоговения

и покорности пред Всемогущим Творцом исполнял еси, грешников же падших мудрыми словесы твоими в сознании своего ничтожества и своей греховности, в покаянии и смирении прибегати к Богу наставляя еси, ободряя их упованием на Его милосердие. Ты николиже притекавших к тебе отвергал еси, но всем отец чадолюбивый и пастырь добрый был еси. И ныне не остави нас, усердно тебе молящихся и твоея помощи и предстательства просящих. Испроси нам у Человеколюбиваго Господа нашего здравие душевное и телесное, утверди веру нашу, укрепи силы наша, изнемогающая во искушениях и скорбех века сего, согрей огнем молитвы охладевшая сердца наша, помози нам, покаянием очистившимся, христианскую кончину живота сего получитьи и в чертог Спасов преукрашенный внити со всеми избранными и тамо купно с тобою поклонятися Отцу и Сыну и Святому Духу во веки веков. Аминь.



Тропарь, глас 8

Православия поборникче, / покаяния и
молитвы делателю и учителю изрядный, /
архиреев богодухновенное украшение, /
монашествующих славо и похвало: писани
твоими вся ны уцело.мудрил еси. / Цевнице
духовная, Игнатие богомудре, моли Слова
Христа Бога, / Ёгоже носил еси в сердце
твоем, / даровати нам прежде конца
покаяние.

Кондак, глас 8

Аще и совершал еси стезю жития
земнаго, святителю Игнатие, обаче непрес-
танно зрел еси законы бытия вечнаго, сему
поучая ученики словесы многими, и.мже
последовати и нам, святче, помолися.



Толгский Свято-Введенский женский монастырь

**Проезд до Толгского Свято-Введенского
женского монастыря:**
от Центрального вокзала г. Ярославля —
на троллейбусе № 1 до остановки "Красная площадь",
затем на автобусе № 21 до остановки "Толгоболь".

Адрес монастыря:
150027 г. Ярославль, поселок Толга,
Толгский Свято-Введенский женский монастырь.

Тел.: 8(4852) 38-55-65

